

庫

編主

要提目總書全庫四

(六十三)

撰等瑤永

行發館書印務商

萬有文庫

第一集一千種

總編纂者

王雲五

商務印書館發行

四庫全書總目提要

卷一百七十九

集部三十二

別集類存目六

【滄海披沙集十三卷】江蘇巡撫採進本 明泌水王朱理堦撰。理堦號玉源。藩簡王模之七世孫。昭定王恬烱子。隆慶元年襲封。萬歷二十九年卒。諡康僖。見明史諸王世表。所著有衡漳初稟。栖雲洞集。雲寶窟言。葵園紀言。公族論等書。嘗刻於遜學書院。繼合爲一編。於吳中重刊之。總名曰滄海披沙集。穆文熙詩話謂王詩丰神俊逸。思致雅澹。格調在大歷以前。今觀集中。若夏日東園詩。月落棋聲久。涼生酒興多。灑龍寺訪孟誠菴詩。借宿閒多咏。求名靜覺非。春初過涵春閣詩。酒嫌蘆筍少。春恨李花多等句。其格調頗近四靈。殊未足追蹤大歷。至於文體。聲牙更不出王李流派矣。

【芝堂遺草七卷】福建巡撫採進本 明葉朝榮撰。朝榮有詩經存固已著錄。是集爲其子大學士向高所刊。凡詩一卷。雜文六卷。其名芝堂者。朝榮判江州時。有靈芝產於所作仕學軒前。改軒曰瑞芝堂。自爲之記。因以名集。朝榮詩格文格。竝明白坦易。大抵偶然涉筆。非刻意欲成一家者也。

【四遊臺六卷】浙江巡撫採進本 明趙志臯撰。志臯有內閣奏疏。臺已著錄。是集前二卷爲初入翰林時作。第三卷爲官南京時作。第四卷爲使楚時作。第五卷爲客粵時作。題曰四遊。蓋取於此。第六卷乃還

山以後之作亦併附焉。

【朱秉器集八卷】浙江汪汝璵家藏本 明朱孟震撰。孟震有河上楮談已著錄。此集文四卷。詩四卷。爲

張九一所選錄。文不出當時習尚。詩則音節諧暢。而意境不深。

【穀城山館文集四十二卷】山東巡撫採進本 明于慎行撰。慎行有讀史漫錄已著錄。此集乃所作雜

文也。明中葉以後。文格日卑。學淺者蹈故守常。才高者破律壞度。慎行之文。雖不涉弔詭之習。至於精心結構。灝氣流行。終未能與唐順之王慎中歸有光等竝據壇坫。故錄其詩集。而文集則附存目焉。

【龐眉生集十六卷】山東巡撫採進本 明于慎思撰。慎思字無妄。號航隱。東阿人。于慎行之弟也。是集詩七卷。雜文八卷。樂府一卷。皆有縱橫排奐之氣。而頗涉粗豪。

【程幼博集六卷】浙江孫仰曾家藏本 明程大約撰。大約字幼博。休寧人。是集爲于慎行所選。凡雜文二卷。詩四卷。多暢所欲言。不拘格律。如泛駕之馬。不可以羈勒範之。前有焦竑序。引孔子辭達之說。謂巷伯之譏刺。巧言之怨怫。何人斯之迫切。自後世論之。豈不傷溫柔敦厚之體。而聖人乃錄之於經。以爲與辭達之旨有合。又稱其骯髒之姿。不爲世俗所約結。持論侃侃。脂韋突梯之人。多所不悅。而亦爲慷慨好義者之所深與。則大約固賦性剛毅直情而徑行者。宜發於文章。亦肖其爲人也。

【雲東拾草十四卷附錄一卷】浙江孫仰曾家藏本 明韓世能撰。世能字存良。長洲人。隆慶戊辰進士。官至南京禮部侍郎。召入兼翰林學士。事蹟附見明史。黃鳳翔傳。世能以鑒藏書畫名一時。張丑所爲輯南陽書畫表也。史稱其教習庶吉士。館閣文字。是科爲盛。考董其昌洛神賦十三行跋。稱館師韓宗伯。則

當爲萬歷己丑科。據明史文苑傳所載焦竑、黃輝諸人固較他科爲稍勝。然世能詩文則不出王、李、門徑。是集爲所自編。沒後二十年其子逢祐乃刊行。附以誥敕、諭祭、葬文及碑銘傳狀。

【玉恩堂集九卷附錄一卷】浙江孫仰曾家藏本。明林景陽撰。景陽字紹熙，華亭人。隆慶戊辰進士。官

至南京太僕寺卿。是集爲其子有麟所編。凡奏議二卷、參詞二卷、詩二卷、文三卷。附錄碑誌行狀一卷。王錫爵、張以誠二序及張孟男所撰碑。申時行所撰墓誌皆不稱其文章。惟杜士全序及王圻所作行狀稍稱之云。

【醒後集五卷續集一卷附京省次五卷】福建巡撫採進本。明盧維禎撰。維禎字瑞峯，號水竹居士。漳

浦人。隆慶戊辰進士。官至戶部侍郎。是集爲維禎致仕以後所自刊。題曰醒後言如夢之醒也。其集以奏疏、公移、評駁、與詩、文、雜著共爲一編。蓋維禎留心吏事，故案牘亦一一錄存。末附京省次一冊，中分地望、次府州縣次、財賦次、會狀次、甲科卿輔次。蓋亦手錄成編，以備紀事。但刊入文集則濫矣。

【朱文懿文集十二卷】浙江巡撫採進本。明朱廣撰。廣字少欽，浙江山陰人。隆慶戊辰進士。官至文華

殿大學士。事蹟具明史本傳。萬歷二十九年大學士趙志臯罷，神宗慮朝臣植黨，乃起廣入閣。後沈一貫、沈鯉竝罷，廣遂獨相七年。史稱其醇謹無過，然無所建白。惟是時東林聲氣傾動一時，廣獨借漢唐宋朋黨之害以立論，謂漢之黨皆君子，而羅小人之害；其勢在小人，故使卓操之徒得以假手，而國移於強臣。唐之黨君子小人互相攻擊，其勢兩盛，而卒兩敗，故使朱全忠得以竊入，而國移於盜賊。宋之黨皆以德、行、文章標表一時，其勢在君子，而芟除太過，不能使其身安於朝廷之上，故使呂、蔡諸人得以藉口而圖

移於隣敵。黨愈衆則害愈深。變愈大。其言切中時病。厥後明社既屋。乃信廣言。其深識早見。有非顧黨諸人所及者。其文則未能自成一家。其人蓋本不以詞章名也。

【王文端集十四卷】山西巡撫採進本。明王家屏撰。家屏有王文端奏疏。已著錄。據明史藝文志。其集凡二十卷。千頃堂書目作復宿山房集。凡四十卷。今未見傳本。是集奏疏四卷。詩二卷。尺牘八卷。凡三種。據尺牘卷首韓爌序。稱家屏之子。已哀藁全帙。次第授梓。則此其不完之本也。朱彝尊明詩綜載其題長陵四駿圖古體詩四首。茲集亦未載入。知其散佚者多矣。

【溪山堂草四卷】浙江汪汝璣家藏本。明沈思孝撰。思孝有秦錄。已著錄。是編乃其晚年之作。思孝名入瑯琊四十子之列。論者謂其晚交姚士舜。故間作警牙之語。然其有韻之文。亦復流麗清脫。特難著喜爲澀體耳。

【天遠樓集二十七卷】浙江孫仰曾家藏本。明徐顯卿撰。顯卿字公望。號檢菴。長洲人。隆慶戊辰進士。官至吏部侍郎。是集爲其嗣子元滂所編。前有王穉登序曰。先生卜居陽羨。士大夫莫名先生文。先生亦不自名文也。余與先生雖同粉櫚。迹若風馬牛。然第聞人言先生長者。遂亦長者先生。未幾先生來過。余每談立言之業。不東向讓。三。即南向讓。再。余竟莫名先生。而僅識先生長者云云。是殆有微詞矣。

【華禮部集八卷】浙江巡撫採進本。明華叔陽撰。叔陽字起龍。無錫人。隆慶戊辰進士。官禮部主事。二十九卒。叔陽爲華察之子。王世貞之壻。故所作五言。頗有父風。七言則詞調朗暢。兼涉太倉流派。其以詩部文部分卷。亦仿世貞四部彙式也。

【開雲館集鈔六卷】兩江總督採進本 明張位撰。位有問奇集。已著錄。是集據于慎行原序。有內外二編。今本乃其從子希載所選錄。故名集鈔。每篇具綴評語。皆希載所爲。明史稱位當神宗竝封三王。遽請篤修交泰。早兆高禩。及疏薦楊鎬。依違礦稅諸事。其疏藁是集皆不載。蓋希載諱而刪之也。又史稱位諡文莊。而此集皆稱文端。則未喻其故矣。集刻於康熙九年。而首有黎元寬序。蓋明末編訂之時。元寬尙在云。

【江岷嶽文集四卷】浙江巡撫採進本 明江以東撰。以東字貞伯。全椒人。隆慶戊辰進士。官至江西提學副使。是集爲其門人謝廷諒。謝廷讚。舒曰敬。晏文輝同編。凡詩一卷。文三卷。皆不出當時風氣。其第一卷目錄。惟載奏疏二篇。而集中併載諸記。又割二卷中序數篇附之。亦編校之疎也。

【鐘臺集十二卷】福建巡撫採進本 明田一儁撰。一儁字德萬。大田人。隆慶戊辰進士。官至禮部侍郎。事蹟具明史本傳。一儁視身嚴苦。家無餘貲。爲侍講時。以劾張居正。救吳中行。有直聲。其人自正詩文。則未能逮古也。

【大泌山房集一百三十四卷】安徽巡撫採進本 明李維楨撰。維楨有史通評釋。已著錄。是集詩六卷。雜文一百二十八卷。而一百二十八卷之中。世家傳誌碑表行狀金石之文。獨居六十卷。記載之富。無逾於是。然牽率之作過多。不特文格卑冗。竝事實亦未可徵信。明史文苑傳。稱維楨爲人樂易闊達。賓客雜進。其文章宏肆有才氣。海內請求者無虛日。能屈曲以副所望。碑版之文。照耀四裔。門下士招富人大賈。受取金錢。代爲請乞。亦應之無倦。然文多牽意。應酬品格。不能高也。朱彝尊明詩綜。亦謂本寧著作。如官

廚宿饌。麋鹿肥麋。雖牖牖具陳。蠹蕞難進。無當於味。今核是集。知非故爲詆毀矣。

【劉聘君全集十二卷】江西巡撫探進本 明劉元卿撰。元卿有大象觀。已著錄。元卿師事耿定向。及同邑劉陽。講求心學。而其詩文。乃多慶弔之篇。罕見闡發理道。類閩中所刊林網山集。考江西通志。元卿所著。本有山居草。還山續草諸編。此本爲其門人洪雲蒸等所輯。觀其體例舛雜。知其去取之失當。蓋已非元卿之舊本矣。

【不二齋文選七卷】浙江巡撫探進本 明張元忬撰。元忬有紹興府志。已著錄。明史儒林傳。稱元忬少負氣節。年十九。聞楊繼盛死。爲文遙祭之。又稱其自未第時。即與鄧以讚從王畿游。傳良知之學。然皆勵志潛修。躬行實踐。以讚品端志潔。元忬亦矩矱儷然。無蹈入禪寂之病。與畿之恣肆迴殊。是集凡文六卷。詩一卷。亦無語錄粗鄙之習。但於是事非常行耳。

【粵草十卷蜀草七卷】江西巡撫探進本 明郭子章撰。子章有蠶衣生易解。已著錄。其平生所作之文。皆每官一地。即爲一集。此粵草其官廣東潮州知府時作。蜀草其官四川提學僉事時作也。前有萬歷庚寅周應鰲序。稱子章沒於廬山。粵草先出。越若干年。蜀草乃出。蓋作於諸草之前。而刻則在子章身後。其標題皆曰自學編。則子章諸草之總名云。

【晉草九卷楚草十二卷家草七卷】江西巡撫探進本 明郭子章撰。是集以晉草楚草家草合爲一編。晉草乃其由浙江參政遷山西按察使時所作。在萬歷二十一年。楚草乃其由山西遷湖廣布政使時所作。在二十二年。家草則由福建布政使入覲歸而乞休時作。在二十六年也。此後即接黔草矣。是集鈔本。

譌脫甚多，併佚其家草之第六卷。考其總目，所闕凡尺牘十八首，故原目八卷。今以七卷著錄焉。

【黔草二十一卷】浙江汪汝琛家藏本

明郭子章撰。是集自爲一編，乃其巡撫貴州時作。總目雖題二

十一卷，而第八卷分九子卷，第九卷第十卷第十一卷第十二卷第十七卷皆分二子卷，卷十四分三子卷，實二十四卷。不明其例。至卷十四後，既曰卷又十四，又曰卷又又十四，尤叵見也。案千頃堂書目：子章所著，尚有閩草十六卷，留草十卷，浙草十六卷，閩藩草九卷，養草一卷，苦草六卷，傳草二十四卷。今皆未見，而粵草十卷，黃虞稷乃不著錄。蓋當時隨作隨刻，又隨意併數種爲一帙，多寡分合，初無一定，故所見參差不一耳。

【李中丞文集二卷】江西巡撫探進本

明李涑撰。涑字源甫，號養愚，零都人。隆慶辛未進士，官至右僉

都御史，巡撫應天。是集爲國朝康熙十年，其里人易學實所刻，大抵皆應俗之作。蓋涑本以清介著，學實之刻其遺文，特重其爲人耳。

【文潔集四卷】江西巡撫探進本

明鄧以讚撰。以讚字定宇，新建人。隆慶辛未進士，官至吏部侍郎。諡

文潔。事蹟具明史儒林傳。以讚早以孝行聞，晚退居西山三十年，以清介爲世所重，而無所著述。此本乃吉水鄒元標蒐輯於斷簡散帙之中，宜與吳達可爲之付梓。其講學語僅存數則，餘不過奏疏三首，與書序記傳諸應酬之文耳。中附詩數十首，尤非所長也。

【方初菴集十六卷】浙江孫仰曾家藏本

明方揚撰。揚字思善，號初菴，歙縣人。隆慶辛未進士，官至杭州府知府。是集第一卷爲語錄，二卷爲箴論，三四卷爲詩，五卷至十六卷爲雜文。其語錄箴論，尙皆切實。

惟詩文多應酬之作。末附莅官時諸告條。尤爲冗雜。揚本有山中燕中中州南署等稟。此集乃其門人賀燦然所合編也。

【陳如岡文集二卷】兩江總督探進本 明陳大科撰。大科字思進。號如岡。南通州人。隆慶辛未進士。官

至右都御史兼兵部侍郎。總督兩廣。大科官給事中時。因歲早上弭災六事。遷太常卿時。又疏救李獻可等。又劾太監馮保。有直聲。及總督兩廣。有定安南功。是集上一卷。具錄當時奏疏。下一卷。則雜文數篇而已。

【賜餘堂集十四卷】內府藏本 明吳中行撰。中行字子道。號復菴。武進人。隆慶辛未進士。官編修時。與趙用賢等論張居正廷杖削籍。後屢起屢廢。卒不大顯。終於侍講學士。掌南京翰林院事。事蹟具明史本傳。是集爲其子大理寺少卿亮所編。中行以鯁直稱。詞章不甚著於世。集中植綱常正朝廷二疏。氣節凜然。又不以詞章論矣。

【鄒聚所文集六卷外集一卷】浙江巡撫探進本 明鄒德涵撰。德涵字汝海。安福人。隆慶辛未進士。官至河南按察司僉事。明史儒林傳附見其祖守益傳末。是集凡詩一卷。文五卷。其外集一卷。則皆歷官誥敕。及往來書牘也。詩文多涉禪機。持論亦往往偏駁。史稱守益子善服習父訓。踐履無怠。稱其家學。而德涵從耿定理游。定理不答。發憤湛思。自覺有得。於是專以悟爲宗。於祖父所傳始一變云。

【研山山人漫集一卷】浙江孫仰曾家藏本 明方盱撰。盱字文明。後棄舉子業。將遊五岳。取莊子逍遙遊語。改名大年。蘇州人居洞庭東山。是集爲湖州沈庭詔所編。前有隆慶二年姜元序。茅翁積方山人傳。

又列翁積詩評數條。逐體分論。多大言無實。至詆束皙補亡。穢不可讀。其分五言律五言排律爲二格。而云排律本賦體。又謂絕句裁自近體。皆漫無依據。其推重盱詩。以四言六言比嵇康。五言比陶潛。五言律比張九齡。五言絕句比王維。然皆所謂形骸之外。去之愈遠。七言古詩。尤爲淺薄。翁積總評。謂侈萬言於毫末。恣百態於細縹。雖有歉於豪士。實無損於專門。則亦知其才地之弱矣。

【蒼耳齋詩集十七卷】浙江孫仰曾家藏本。明方問孝撰。問孝字胥成。歙縣人。仕履未詳。歙縣志亦無其名。姓集中有與汪道昆詩。當是隆萬間人。其詩風華有餘。深厚不足。蓋亦沿七子之派。多浮聲而少切響也。

【交翠館集十卷】江西巡撫採進本。明萬道光撰。道光字日章。臨川人。是集詩文皆未入格。其學以金谿爲宗。說經諸篇。皆疎於考證。如或謂綱目不出朱子手。道光以爲無的考。是不知有趙師淵也。伊尹放之於桐。放字爲數字之誤。乃沈括夢溪筆談之說。道光亦未能引據。

【汪禹父詩集八卷】浙江孫仰曾家藏本。明汪淮撰。淮字禹父。休寧人。隆慶間山人也。是集皆古今體詩。前有陳履王世貞劉鳳汪道昆吳子玉諸人序。子玉序稱令其伯子懋孝手錄成卷。諗於余。蓋淮所自編。其詩皆依託七子之門戶。故世貞等頗獎借焉。

【巢雲軒詩集六卷續集五卷詩餘一卷】安徽巡撫採進本。明吳宗儒撰。宗儒字次魯。號黃麓。晚號止耕。休寧人。其詩工於聲律。然運意不深。風骨亦未成就。

【卓光祿集三卷】浙江汪如環家藏本。明卓明卿撰。明卿有卓氏藻林。已著錄。所著有卓徵甫詩集續

集。北游稟文集。二山游稟諸編。其子爾康請曹子念哀合刪定。編爲此集。其詩頗囿於風氣。未能自出新裁。

【卓漱甫詩續集三卷】江蘇巡撫採進本 明卓明卿撰。是集爲明卿所自編。刻於萬歷甲申。李維楨序。稱元美兄弟左提右挈。足使漱甫不朽。深有不滿之詞焉。

【廣讌堂集二十四卷】兩淮鹽政採進本 明樊山王朱翊鉅撰。翊鉅字匡鼎。自號隱真子。荆王瞻欄六世孫。萬歷庚子襲封。其父載岑以文行稱。翊鉅世其家學。與弟翊鏊。翊鏊皆好爲詩。兄弟嘗共處一樓。號花萼社。楚藩多強橫。樊山一派。其最文雅者也。是集賦及三言四言詩共一卷。五七言古今體詩共二十二卷。長短句一卷。大抵多近香山之派。末有道德經說奧二卷。題曰朱孟嘗撰。蓋亦楚宗。是以附錄。與詩集爲不倫。今別入子部道家類焉。

【梅雪軒詩稟四卷】兩淮鹽政採進本 明朱敬鑪撰。敬鑪字進父。秦愍王棖八世孫。萬歷中爲奉國中尉。詩格淺弱。敷衍成篇而已。

【樂陶吟草三卷】浙江巡撫採進本 明姚舜牧撰。舜牧有易經疑問。已著錄。是集乃康熙癸丑。其曾孫淳顯所刊。朱彝尊靜志居詩話。謂舜牧以厚德聞鄉里。事難悉書。詩不專工。然頗自喜。今觀是編。皆沿白沙定山之派。首載論詩二首。有云。試讀三百篇。寫意不求工。但能矢口發。含著自無窮。其宗旨可見矣。淳顯後序所刊乃詩文全集。此本有詩而無文。豈佚其半耶。

【林初文詩選一卷】兩江總督採進本 明林章撰。章本名春元。字初文。福清人。萬歷癸酉舉人。坐黨議。

名。後上書言兵事。瘐死於獄。是集前有曹學佺序。曰初文才士爲嫉者所中。所作多散佚。其子哀輯爲一帙。梁溪尤時純付梓。則是集本有刊版。而此乃寫本。蓋傳錄於版佚之後也。凡賦二首。詩八十二首。學佺序稱其海月賦。而此本無之。蓋鈔胥又有所漏矣。

【鬱儀樓集五十四卷】江蘇巡撫探進本 明鄒迪光撰。迪光字彥吉。無錫人。萬歷甲戌進士。官至湖廣提學副使。年四十即罷歸。築室惠山。多與文士觴詠。優游林下者幾三十年。時王世貞已沒。迪光欲代領其壇坫。然竟不能也。是集凡賦一卷。詩二十九卷。雜文二十四卷。其詩文皆欲矯雕鏤。翻成淺易。故朱彝尊靜志居詩話深不滿焉。特略取其絕句而已。

【石語齋集二十六卷】兩江總督探進本 明鄒迪光撰。其以石語名齋。蓋用庾信讀溫子昇韓陵山寺碑事。亦高自位置矣。案江南通志文苑傳載迪光集凡三百餘卷。而不詳其名。明詩綜載迪光所著有鬱儀樓集。調象菴彙。始青閣集。不載此集。明人集刻本叢雜著錄互異。此亦其一也。

【調象菴彙四十卷】兩江總督探進本 明鄒迪光撰。案涅槃經曰。譬如醉象狂騷暴惡。多欲殺害。有調象師以大鐵鉤鉤斫其項。即時調順。惡心都盡。一切衆生亦復如是。貪慾瞋恚愚癡。醉故欲多造惡孽。諸菩薩等以聞法鉤斫之。令住。更不得起造諸惡心云云。此編乃迪光之續集。蓋晚歲所作。時方歸心釋氏。故以調象名菴。因以名集云。

【快獨集十八卷】山東巡撫探進本 明李堯民撰。堯民字耕堯。濟寧人。萬歷甲戌進士。官至工部右侍郎。是集凡詩六卷。文十二卷。快獨者所居樓名也。雜文中奏議一類。敷陳頗爲剴切。詩則秀潤有餘。而興

象不足純爲七子之派故序之者爲李維楨焉。

【征南草一卷】陝西巡撫採進本 明王邦俊撰邦俊字虞卿鄜州人萬歷甲戌進士官至貴州兵備參

政是編卽貴州所作時苗民不靖起邦俊理兵事故以征南爲名凡詩三十餘首賦一首又母老乞致仕上兩院呈詞一首亦竝附焉。

【林伯子詩草一卷】福建巡撫採進本 明林兆珂撰兆珂有詩經多識編已著錄此集本名挈朋草其

題曰林伯子者蓋其序爲柯壽愷所作乃當日同社之辭也凡詩二百三十餘首其中七言律詩頗得錢劉風調集中亦惟此體最多古詩則不能入格蓋晉安一派皆從七言律詩入門也。

【隅園集十八卷續川集八卷】浙江巡撫採進本 明陳與郊撰與郊有檀弓集註已著錄隅園集皆所

作雜文及詞曲其文摹仿漢魏似古色斑駁而不出弇州四部之門徑又以其子臯坐鹽徒事陷冤獄上書武安王及縣城隍神亦載集中雖秦詛楚文古有其事編入文集頗覺不倫續川集皆其里居之時與人尺牘益爲小品矣與郊集總名奉常佚藁凡分四種首爲隅園集次爲黃門集次爲續川集次爲詒癡符詒癡符者語出顏氏家訓謂可笑之詩賦也今黃門集別入奏議詒癡符又有錄無書故惟以此二編著錄集部焉。

【去僞齋文集十卷】江蘇巡撫採進本 明呂坤撰坤有四禮疑已著錄是集爲其孫慎多等所刊坤於

明季講學諸儒中最爲篤實是集亦多有裨世道之文而出於後人之編錄一切俳諧筆墨無不具載夫韓愈難說僅數條耳其他寓言惟毛穎傳石鼎聯句編入集中革華傳嘲駭睡諸篇即不編入李湛泉以

爲有識。惜編是集者昧此也。至於應俗之文。連牘不已。益爲眼中金屑矣。

【來禽館集二十九卷】浙江汪汝璥家藏本

明邢侗撰。侗字子愿。臨邑人。萬歷甲戌進士。官至陝西行

太僕卿。明史文苑傳附載。董其昌傳中是集。凡文二十四卷。詩僅五卷。侗以善書得名。當時有北邢南董之目。其序于慎行詩集。謂李何學唐爲化鳩之眼。而於太倉歷下竝有微詞。蓋能不依七子門戶者。故所作大抵和平雅秀。王士禛論詩絕句。亦有來禽夫子本神清之語。特骨幹未堅。不能自成一隊。文體則更近於澀矣。

【支子餘集五十二卷】浙江汪汝璥家藏本

明支大綸撰。大綸有世穆兩朝編年史。已著錄。是編乃大

綸自萬歷丙子至壬寅所撰詩賦雜文。凡藝餘十四卷。政餘八卷。屯餘八卷。耕餘八卷。數餘二卷。述餘六卷。又永陵編年史四卷。昭陵編年史二卷。即所爲世穆兩朝編年史也。集內酬應之作居多。語亦閒涉荒誕。觀其自題像贊及題觀音像贊。竟以孔子自居。是何言歟。

【御龍子集七十七卷】兩江總督採進本

明范守己撰。守己有曲洧新聞。已著錄。是編以集爲名。實則

兼收其說部。故目錄每卷惟署曰御龍子第幾。首爲膚語四卷。次天官舉正六卷。次參兩通極六卷。次即曲洧新聞四卷。次乃爲吹劔草五十三卷。膚語皆襲宋人緒論。無所發明。天官舉正則鈔撮各史天文志。亦無所考正。參兩通極摹仿太玄潛虛皇極經世諸書。於八卦之外別爲元息進隆中消殺沮八卦名。因而乘之爲九八七十二卦。以當七十二候。變彖曰繹。變象辭曰真。變爻象曰絲。末爲索辭八篇。以擬繫辭。又出諸家僭經之下。曲洧新聞雜記時事。蓋仿朱弁曲洧舊聞。而於張居正屢以謀篡書之。未免恩怨之

詞不足徵信。吹劔草爲所作詩文。自稱不作唐以後語。然刻意摹擬。斧鑿之痕不化。

【郢聖集十二卷】浙江孫仰曾家藏本 明范守己撰。是編於宦遊所至。各爲一集。曰西餉。曰雲間。曰雲間。

曰北行。曰吳中。曰詩文。詞賦雜編。不分體裁。王世貞爲之序。語亦在抑揚之間。

【場居集二卷。田居藁一卷。河上藁一卷】直隸總督採進本 明李化龍撰。化龍有平播全書。已著錄。其

平生以經濟著。平播治河諸疏。表表當代。原不必以詩見。乃必欲以功業兼文章。其畫蛇之足乎。

【少室山房續藁十五卷】浙江汪汝璣家藏本 明胡應麟撰。應麟有筆叢。已著錄。是編凡兩都集一卷。

蘭陰集一卷。華陽集十卷。養疴集二卷。青霞藁一卷。僅止五種。蓋類藁未出以前。隨作隨刊之本也。

【郊居遺藁十卷】安徽巡撫採進本 明沈懋學撰。懋學字君典。宣城人。萬歷丁丑進士。第一授翰林院

修撰。追謚文節。事蹟附見明史。田一僞傳。是編詩三卷。雜文七卷。萬歷乙巳。其兄子有容。刻於福建。懋學

官翰林時。值張居正奪情。與吳中行。趙用賢。謀各上疏。吳趙皆受杖去國。而懋學疏章。爲人所持。不果進。

乃貽居正子嗣修書。又與工部尙書李幼滋書以爭之。今集中有擬救建言諸臣。令大學士張居正奔喪。

疏一篇。蓋即其時未上之藁。然非擬疏之難。上疏之難也。既未上矣。存之何爲乎。

【快雪堂集六十四卷】浙江朱彝尊家藏本 明馮夢禎撰。夢禎有歷代貢舉志。已著錄。夢禎舊

藏王羲之快雪時晴帖。故以名堂。後帖歸馮銓。堂名亦隨之而移。實則始自夢禎也。是編文六十二卷。

止二卷。所作皆喜於疏快。不以鏤刻爲工。而隨意所如。無復古人矩矱矣。

【海門先生集十二卷】浙江朱彝尊家藏本 明周汝登撰。汝登有聖學宗傳。已著錄。是集

明周汝登撰。汝登有聖學宗傳。已著錄。是集

十卷。詩二卷。集中如九解九篇。越中南都剡中東粵新安會語五篇。皆聚徒講學之語。其釋良知二字。謂良訓甚也。當如至善至德至禮至樂太極太初等。至字太字。皆甚字之義。有不可擬議。不可名言之妙。其立義新奇。非惟孟子無此說。即王守仁亦無此說。斯真龍溪未派。惟所欲言者矣。詩亦作白沙定山之體。其正唐詩一十五首。尤不可解。如取李白問余何事棲碧山一首。翻其意而竄改之。曰桃花流水依然在。別有天地只人間。是不幾王安石之一鳥不鳴山更幽乎。

【東越證學錄十六卷】安徽巡撫探進本 明周汝登撰。汝登傳王畿之說。故是錄以證學爲名。而會語亦與詩文並列。

【可菴書牘十卷】兩江總督探進本 明張棟撰。棟字可菴。崑山人。萬歷丁丑進士。官至兵科都給事中。是編爲其邑人王煥所編。以其歷任書牘分卷排纂。亦王儉一官一集之例也。

【詹養貞集三卷】江西巡撫探進本 明詹事講撰。事講字明甫。別號養貞。江西樂安人。萬歷丁丑進士。官至北直隸提學御史。其集初刻於萬歷戊戌。凡文三卷。詩四卷。後詩集散佚。僅存文集。國朝乾隆庚申。其玄孫道行重刊之。即此本也。事講從羅洪先遊。傳姚江良知之學。陳獻章王守仁之從祀。實允事講之請。集中以此疏爲冠。蓋其生平宗旨所在也。

【片玉集四卷】江西巡撫探進本 明陳邦科撰。邦科字俊卿。號警亭。高安人。萬歷丁丑進士。官至河間府知府。是集凡閭瀛漫語一卷。言責要覽一卷。留臺疏稟一卷。聽花軒摘稟一卷。其閭瀛漫語。皆設爲問答。以辨析物理。力闢星命輪迴之說。持論甚正。其謂欲端善敗之原者。謹諸德。握治亂之機者。慎諸人。先